

judicaturum? Ubi sedebis? Duodecim sedes dixit Dominus duodecim Apostolos: unus cecidit Judas, in locum ipsius sanctus Mathias ordinatus est; impletus est duodenarius numerus sedium. Primo locum inveni, ubi sedetas, & sic te minare judicaturum. Duodecim ergo sedes quid sibi velint, videamus. Sacramentum est cuiusdam universitatis, quia per totum orbem terrarum futura erat Ecclesia: unde vocatur hoc edificium ad Christi compagem.

R. Beati estis cum maledixerint vobis homines, & persecuti vos fuerint, & dixerint omne malum adversum vos, mentientes, propter me: * Gaudete & exultate, quoniam merces vestra copiosa est in caelis. * Cum vos oderint homines, & cum separaverint vos, & exprobraverint, & ejecerint nomen vestrum tamquam malum propter Filium hominis. Gaudete.

Lectio vi.

ET ideo quia undique venit ad iudicandum, duodecim sedes sunt: sicut quia undique intratur in illam civitatem, duodecim porte sunt. Non solum ergo illi duodecim, & Apostolus Paulus, sed quosque iudicaturi sunt, propter significationem universitatis ad

sedes duodecim pertinent: quemadmodum quotquot intrabunt, ad duodecim portas pertinent. Partes enim mundi quatuor sunt, Oriens, Occidens, Aquilo, & Meridies. Istae quatuor partes assidue nominantur in Scripturis. Ab istis quatuor ventis, sicut dicit Dominus in Evangelio, & quatuor ventis se collecturum electos suos ab omnibus ergo istis quatuor ventis vocatur Ecclesia. Quomodo vocatur? Undique in Trinitate vocatur. Non vocatur nisi per baptismum in nomine Patris, & Filii, & Spiritus sancti. Quatuor ergo ter ducta, duodecim inveniuntur.

R. Isti sunt triumphatores, & amici Dei, qui contentientes iussa principum, meruerunt premia aeterna: * Modò coronantur, & accipiunt palmam. * Isti sunt qui venerunt ex magna tribulatione, & laverunt stolas suas in sanguine Agni. Modò coronantur. **G**loria Patri. Modò.

PRO EVANGELISTIS

Lectioes.

In primo Nocturno.

Incipit liber Ezequielis Prophetae.

Lectio j. *Cap. i.*

ET factum est in trigésimo anno, in quarto, in quinta mensis, cum essem in medio captivorum

rum juxta fluvium Chobar, aperti sunt caeli, & vidi visiones Dei. In quinta mensis, ipse est annus quintus transmigrationis regis Joachin, factum est verbum Domini ad Ezechielem filium Buzi, sacerdotem in terra Chaldaeorum, secus flumen Chobar: & facta est super eum ibi manus Domini. Et vidi, & ecce ventus turbis veniebat ab Aquilone, & nubes magna, & ignis involvens, & splendor in circuitu ejus: & de medio ejus quasi species electi, id est, de medio ignis.

R. Ecce ego mitto vos sicut oves in medio luporum, dicit Dominus, * Estote ergo prudentes sicut serpentes, & simplices sicut columbae. * Dum lucem habetis, credite in lucem, ut filii lucis sitis. Estote.

Lectio ij.

ET in medio ejus similitudo quatuor animalium: & hic aspectus eorum, similitudo hominis in eis. Quatuor facies uni, & quatuor pennae uni. Pedes eorum pedes recti, & planta pedis eorum quasi planta pedis vituli, & scinille quasi aspectus aris candentis. Et manus hominis sub pennis eorum in quatuor partibus: & facies & pennas per quatuor partes habebant: junc-

taeque erant pennae eorum alterius ad alterum. Non revertentur, cum incederent: sed unumquodque ante faciem suam gradiebatur. **R.** Tollite jugum meum super vos, dicit Dominus, & discite a me, quia mitis sum, & humilis corde: * Jugum enim meum suave est, & onus meum leve. * Et invenietis requiem animabus vestris. Jugum.

Lectio iij.

Similitudo autem vultus eorum, facies hominis, & facies leonis a dextris ipsorum quatuor: facies autem bovis a sinistris ipsorum quatuor, & facies aquilae desuper ipsorum quatuor. Facies eorum, & pennae eorum extente desuper: duae pennae singulorum jungebantur, & duae tegebant corpora eorum: & unumquodque eorum coram facie sua ambulabat: ubi erat impetus spiritus, illuc gradiebantur, nec revertentur cum ambularent.

R. Dum steteritis ante reges & principes, nolite cogitare quomodo, aut quid loquamini: * Dabitur enim vobis in illa hora, quid loquamini. * Non enim vos estis qui loquamini: sed Spiritus Patris vestri, qui loquitur in vobis. Dabitur. **G**loria Patri. Dabitur.

In secundo Nocturno.

De Expositione sancti Gregorii Pape super Ezechielam Prophetam.
Homil. 3. lib. 1.

Lectio iv.

Sancta quatuor animalia, quae prophetia spiritu futura praevidentur, subtili narratione describuntur, cum dicitur: Quatuor facies uni, & quatuor pennae uni. Quid per faciem, nisi notitia, & quid per pennas, nisi volentis exprimitur? Per faciem quippe uniusquisque cognoscitur: per pennas vero in altum avium corpora sublevantur. Facies itaque ad fidem pertinet, penna ad contemplationem. Per fidem namque ab omnipotenti Deo cognoscimur, sicut ipse de suis ovis dicit: Ego sum pastor bonus, & cognosco oves meas, & cognoscunt me meae. Qui rursus ait: Ego scio quos elegerim. Per contemplationem vero, qua super nosmetipsos tollimur, quasi in aera levamur.

¶ Vidi conjunctos viros habentes splendidas vestes, & Angelus Domini locutus est ad me dicens: Isti sunt viri sancti, facti amici Dei. ¶ Vidi Angelum Dei fortem, volantem per medium caelum, voce magna clamantem, & dicentem. Isti sunt.

Lectio v.

Quatuor ergo facies uni sunt: quia si requiras quid Mattheus de incarnatione Domini sentiat, hoc nimirum sentit, quod Marcus & Lucas, & Joannes, si queras quid Joannes sentiat: hoc procul dubio, quod Lucas, Marcus, & Mattheus, si queras quid Marcus, hoc quod Mattheus, Joannes, & Lucas, si queras quid Lucas, hoc quod Joannes, Mattheus, & Marcus sentit. Quatuor ergo facies uni sunt: quia notitia fidei, qua cognoscuntur a Deo, ipsa est in uno, quae est simul in quatuor. Quidquid enim in uno invenis, hoc in omnibus simul quatuor cognosces.

¶ Beati estis cum maledixerint vobis homines, & persecuti vos fuerint, & dixerint omne malum adversum vos, mentientes vos, & exprobraverint, & ejecerint nomen vestrum tanquam malum propter Filium hominis. Gaudete.

Lectio vi.

ET quatuor pennae uni, quia Dei omnipotentis Filium Dominum nostrum

Je-

Jesum Christum simul omnes concorditer predicant: & ad divinitatem ejus mentis oculos levantes, penna contemplationis volant. Evangelistarum ergo facies ad humanitatem Domini pertinet, penna ad divinitatem: quia in eum, quem corporeum aspiciunt, quasi facies intendunt: sed dum hunc esse incircumscripsum atque incorporeum ex divinitate annuntiant, per contemplationis pennam quasi in aera levantur. Quia itaque una est fides incarnationis ejus in omnibus, & per contemplatio divinitatis ejus in singulis, recte nunc dicitur: Quatuor facies uni, & quatuor pennae uni.

¶ Isti sunt triumphatores, & amici Dei, qui contemnentes jussa principum, meruerunt premia aeterna: Modò coronantur, & accipiunt palmam. ¶ Isti sunt qui veniunt ex magna tribulatione, & laverunt stolas suas in sanguine Agni. Modò coronantur. Gloria Patri. Modò coronantur.

In tertio Nocturno.

Lectio sancti Evangelii secundum Lucam.

Lectio vij. Cap. 10.

In illo tempore: Designavit Dominus & alios septuaginta duos: & misit illos binos ante faciem suam,

in omnem civitatem & locum, quo erat ipse venturus. Et reliqua.

Homilia sancti Gregorii Pape.

Homilia 17. in Evangelia.

Dominus & Salvator noster, frater charissimus, aliquando nos sermonibus, aliquando vero operibus admonet. Ipsa enim facta ejus, praecipua sunt: quia dum aliquid tacitus facit, quid agere debeamus innouescit. Ecce enim binos in predicationem discipulos mittit: quia duo sunt praecipua charitatis, Dei videlicet amor, & proximi: & minus quam inter duos, charitas haberi non potest. Nemo enim proprie ad semetipsum habere charitatem dicitur: sed dilectio in alterum tendit, ut charitas esse possit.

¶ Isti sunt qui viventes in carne, plantaverunt Ecclesiam sanguine suo: Calicem Domini biberunt, & amici Dei facti sunt. ¶ In omnem terram exivit sonus eorum, & in fines orbis terra verba eorum. Calicem Domini.

Lectio viij.

Ecce enim binos ad predicandum discipulos Dominus mittit: quatenus hoc nobis tacitus innuat, quia qui charitatem erga alterum non habet, predicationem